

# **POESIE SCELTE**

*a cura di Alberto Criscenti*

## A ME MATRI

1<sup>a</sup> classificata

al 1° Premio Provinciale ACLI - Custonaci, 1978

Mamma, chi sulu mamma numinari  
sentu ntô cori ‘n amurusu arduri;  
mamma, palora chi fa cunsulari  
puru lu nostru supremu Signuri!  
Mamma, lu cori mi sentu spustari  
quannu m’arrassu di li to’ caluri;  
mamma, surgenti chi nun po asciucari,  
fatta d’affettu, fidiltà ed amuri.

Duluri quannu a luci nni mittisti,  
quantu sforzi e sururi tu virsasti;  
mamma, cu lu to sangu nni nutristi,  
cu stentu e cu fatica nn’allivasti.  
Mamma, chi pi nui quantu suffristi,  
tutta la vita to sacrificasti;  
lu cchiù forti amuri nni mittisti,  
tutti li suffirenze ti scurdasti.

Stintasti cincu figghi nta sta vita,  
presenti sulu jò di sta casata!  
Nta lu to cori regna ‘na firta,  
passi li jorna sempri ‘ngustiata.  
La to vista di l’occhi fu curpita  
pi chianciri ‘i to figghi ogni jurnata.  
Mamma, quannu si morta e sippillita  
di diri “figghi” la to cùitata!

## L' OMU AVARU

1<sup>a</sup> classificata

al 1° Concorso di Poesia Dialettale  
“Radio Birgi Sound” – Marsala, 1983

Jò parlu di l'avaru e tu, natura,  
di l'omu 'nsaziabili criari;  
'na vita amara, dispirata e dura  
supra sta terra chi ci porti a fari  
chi mancu si n'adduna quannu scura?  
La notti, jornu la vulissi fari,  
privannusi di tuttu si trascura  
pinsannu sulu e sempri d'aggranfari.

Avaru, si lu stessu di lu mari,  
ricivi sempri e nun si inchi mai;  
a l'universu vulissi arrivari,  
ti danni l'arma e nati nta li guai.  
Tu, cchiù pusseri, cchiù voi acquistari,  
peggiu d'un dispiratu ti ni stai.  
Tu criri chi lu munnu arriritari  
e ancora chi si mori nun lu sai?

Fai l'avaru chi chissu t'attira,  
sdilliriu, scuntenti, pecchi spissu  
e mancu duni ô poviru 'na lira  
ed anzi spurpi sanu puru a chissu.  
Ti pigghianu pi mostru cu t'ammira,  
puru nimicu di lu Crucifissu.  
Vai a finiri, quannu si fa sira,  
nta la casa d'infernù, nta l'abbissu.

Chissu ti dicu e m'â ringraziari,  
dicennu virità nun t'aju offisu;  
si voi lu nostru sistema sulari  
pigghialu, nun mi diri dunn'è misu.  
Dannatu mori, nun c'è cchiù chi fari  
quannu Satana ti porta l'avvisu;  
nuru nascisti, nuru arriturnari  
chi ti porti un tappu malu misu.

## **PARI CHI FUSSI JUCARI LA MURRA**

1<sup>a</sup> classificata

al 1° Concorso di Poesia Dialettale  
“Giuseppe Denaro” - Palermo, 1984

Pari chi fussi jucari la murra:  
un Statu contru a n' autru ntima verra;  
c'è lu zuinu chi ci fa la 'n furra,  
lu turrurista l'uffinsiva sferra.  
Furti, siquestri, dilitti, camurra  
e d'attintati c'è lu serra serra.  
Tagghianu carni umana comu surra,  
negghi di sangu vapura la terra!

## **A ME MUGGHIERI**

Tu si la vita mia, fidili mogghi,  
semu vecchi, malati e su' 'mpirugghi;  
éramu pianti cu frutti, cu fogghi,  
ora ci sunnu 'n terra li fanfugghi.  
Si nun c'è cchiù lu fruttu chi si cogghi?  
St'arvuli vecchi ch'arrestanu? Nugghi!  
Rosa, chiuremu veru la partita:  
semu a la fini di la nostra vita!

## BUSETU DI NOTTI

Appena chi s'affaccia di Purteddi  
taliati Busetu quannu scura,  
pàrinu stiddi tutti ddi ciammeddi,  
alluminatu fa la gran fiura.  
Tuttu paratu di lamparineddi  
mi pari ch'è Milanu addirittura!  
Pàrinu sonnu ddi luci lucenti  
e tutti l'abbitanti bona genti!

## LA VICCHIAIA

Nta la vicchiaia la vista nn'accurza  
e nta la ntisa nni veni la mazza;  
si va parrannu cu la lingua muzzza,  
alléntanu li ammi e poi li vrazza.  
A pipiari la siringa appuzza  
carennu nta li scarpi l'acqua pazza,  
ma nun dicemu puru dda cusuzza:  
nun si rimina mancu si l'ammazza.